

Lectio Divina - Corpus Christi B (Mc 14,12-16.22-26)

Narrasaun selebrasaun paskál Jezús nian ho nia eskolante sira, molok nia mate, mak eukaristia sarani nia sertidaun moris nian: inisiativa mai husi Jezús nia parte no eskolante sira tuir ninia instrusaun iha preparasaun. Detalle ne'e la'ós insignifikante ka simples: iha Jezús nia meza la'ós katak naran sé mak hakarak mai han, maibé ida-ne'ebé simu konvite; maibé konvite la dehan katak la presiza esforsu preparasaun nian. Iha kedas han-kalan ikus nian, iha hahalok saran paun no tua nian, sai sínteze kona-ba buat ne'ebé akontese, no sai interpretasaun kona-ba saran moris rasik nu'udar moruk foun; buat ne'ebé sai memória la'ós konvivénsia ho Jezús, maibé ninia vontade atu mate maka sai memória no motivu agradesimentu ba nafatin nian ba sira ne'ebé partilla ho ninia meza. Ita-nia eukaristia sira ne'ebé moris husi Jezús nia saran an ba ema barak, tenke prepara no selebra ho saran an rasik: memória eukarístika la'ós fiél, se la repete ho jestu eukarístiku sira: simu Jezús nia presente ba ita-nia moris husu no obriga ita atu sai presente ba maluk sira, isin no klamar. Nune'e de'it mak ita halo sai kredivel ita-nia selebrasaun sira.

LEITURA

“Iha loron uluk Paun fermentu laek nian, wainhira sira hasa'e buat karan Paskua nian, eskolante sira husu ba Jesus, “Ita hakarak katak ami hadia han hemu Paskua nian iha nebe los?” Jesus haruka eskolante Na'i rua hodi dehan ba sira, “Imi ba sidade laran. Mane ida nebe lori be iha buli ida sei la'o hasouru imi. Imi tuir nia, no iha fatin nebe nia tama, imi husu ba uma na'in: 'Mestre husu: fatin nebe Ha'u atu halo han hemu Paskua nian hamutuk ho Ha'u nia eskolante sira iha los nebe?’ Nia sei hatudu fatin luan ida iha andar leten nebe nahe no halo furak ona. Imi hadia sasan sira iha neba.” Eskolante sira ba sidade. Sira hetan buat hotu nudar Nia dehan ba sira. Sira hadia sasan hotu ba han hemu Paskua nian. Sira han dau-daun, Jesus kaer paun, fo bensa hodi silu no fo ba Nia eskolante sira dehan, “Imi simu ba. Ne'e Ha'u nia isin.” Tuir mai, Nia foti kalis, fo agradesese no fo ba sira. Sira hotu hemu. Jesus dehan ba sira, “Ne'e Ha'u nia ran, ran aliansa nian, nebe sei nakfakar tamba ema lubun boot. Ha'u dehan los ba imi: Ha'u sei la hemu tan housi uvas fuan to'o loron nebe Ha'u sei hemu tua foun iha Maromak nia reinu.” Hananu tiha knananuk hahi nian ida, sira sa'e ba foho Oliveira nian”.

I. LEE: KOMPRENDE BUAT NE'EBÉ TESTU DEHAN

Aprezenta hotu tiha iha ninia loron dahuluk hela iha Jeruzalém (Mc 14,1-11) kona-ba grupu tolu nia pozisaun hasoru Jezús (14,1-2.3-9.10-11), evanjelista loke loron foun ida (Mc 14,12), iha ne'ebé hatuur epizódium tolu ne'ebé eskolante sira maka destinatáriu mesak, no han-kalan paskál nu'udar ambiente no motive. Mc 14,12-16: preparasaun sira; Mc 14,17-21: hateten sai kona-ba atu fa'an nia; Mc 14,22-25: han-kalan ikus). Jezús foti responsabilidade atu prepara han-kalan ba hotu, partisipa nu'udar ema justu ne'ebé nia belun ida sei fa'an. No tanba hatene antes, nia mós antisipa ninia saran an ho jestu no liafuan sira.

Testu ne'ebé liturjia oferese hasai tiha previzaun kona-ba fa'an Jezús; sentru ba ita-nia leitura maka selebrasaun han-kalan nian. Maski nia iha karakter páskua nian (Mc 14,12.16) Marcos la haktuir, nia mós la temi kona-ba bibi-oan nu'udar elementu baze han-kalan páskua nian. Nia fó hanoin de'it kona-ba epizódiu rua han-kalan nian.

Ida dahuluk (Mc 14,12-16) inisiativa mai husi eskolante sira; maibé Jezús nia lala'ok hatudu Nia nu'udar eventu ne'e nia na'in: nia hatene molok no didi'ak buat ne'ebé akontese; liufali antisipa, nia influencia ninia lala'ok ka realiasaun. Jezús nia paixaun maka lori to'o rohan Maromak nia vontade; nune'e maka supera tiha, teolojikamente, eskándalu krús nian. Iha nia rasik, epizósiu aprezena tensaun interna ida iha nia laran: ba eskolante hotu nia lia-husun kona-ba iha-ne'ebé maka nia hakarak prepara han-kalan paskál (Mc 14,12), Jezús hatán no haruka nain rua husi sira atu bá fatin presizu ida atu han festa páskua ho sira (Mc 14,13-14) no iha ne'ebé nia sei hasoru sira sanulu-resin-rua (Mc 14,17). Eskolante sira preokupa ho Jezús nia han-kalan páskua nian, maibé Jezús rasik hatudu ba sira iha-ne'ebé sira tenke bá no iha-ne'ebé nia sei han ho sira, iha uma ne'ebé ikusmai Komuidade sarani dahuluk halibur malu (Apostólu sira-nia hahalok 1,13).

Signifikativu tebes oinsá Marcos fó detalle sira preparasaun nian ba an-kalan ikus. Ida-ne'e modu ida atu subliña importánsia han hamutuk. Jezús bá daudaun hasoru nia mate. Nia tama Jeruzalém (Mc 11,1-4) no prepara ninia han-kalan ikus nian (Mc 14,12-16) hodi enfrenta akontesimentu sira nu'udar buat hotu nia Na'in. Nia kaer situasaun iha liman laran no nia halo previzaun kona-ba sá maka sei akontese. Ninia mate mean la'ós asidente ida ka frakasu pesoál ida. Jezús gia eskolante sira. Sira husu kona-ba ninia orden sira (Mc 14,12) no sira kumpre (Mc 14,16) ... naran katak terus no krús la kona sira-nia moris. Nla hakarak fahe refeisaun ida ho nia eskolante sira no pasa nia kalan ikus moris nian ho sira.

Narrasaun instituisaun han-kalan ikus nian (Mc 14,22-26), mak epizódiu daruak ita-nia testu nian. Nia iha estrutura klara: introdusaun badak ida (Mc 14,22) no tuir ho narrasaun instituisaun nian (Mk 14,22b-24), mo tuirmai fraze tipu eskatolójika ida (Mc 14,25), no ikusmai konkluzau (Mc 14,26). Instituisaun Eukaristia nian akontese liuhusi Jezús nia jestu ida (Mk 14,22b.23a), ne'ebé nia rasik interpreta (Mc 14,22c.24-25). Ne'e mak han-kalan ikus husi han-kalan barak no sai ai-kanoik ba han-kalan definitivu ne'ebé atu mai. Komuidade moris nian ne'ebé promete ona no selebra iha antispasaun, sei presiza manán difikuldade barak (Mc 14,26-31).

Marcos foti narrasaun badak ne'e husi tradisaun ne'ebé iha no troka uitoan. Nla redús deskrisaun han-kalan ikus nian kona-ba instituisaun, tau ho modu significativu entre previzaun ba ninia traisaun (Mc 14,18-21) no ida ninia negasaun nian (Mc 14,27-31). Istória tomak konsentra iha Jezús nia hahalok, ka di'ak liu, iha significadu ne'ebé Jezús fó ba ninia hahalok (Mc 14,22.24). Interpretasaun ne'ebé Jezús fó tama di'ak iha senáriu atuál. Festajudeu sira nian ma khan-kalan ritual ida, Maski nune'e, lahanesan ho han-kalan ne'ebé fó hanoin kona-ba ézodu husi Ejiptu, narrasaun instituisaun nian antisipa buat ne'ebé sei mai, Jezús nia paixaun no mate. Paun no tua identifika ho Jezús nia isin no raan ne'ebé, nia dehan, sei nakfakar ba ema barak. Laiha ona possibilidade atu han-kalan tan ho Jezús, to'o nia hemu tua foun iha Maromak nia reinu.

II. MEDITA: APLIKA BUAT NE'EBÉ TESTU DEHAN BA MORIS

Tuir tradisaun antiga ida, Corpus Christi maka loron espesial ida, marka ho espozisaun pública fiar nian. Sé maka nunca tuir prosisaun eukarística ka karik akompañia família ida ne'ebé halo primeira-komuñauñ iha loron ne'e? Kreda halo selebrasaun fiar nian iha Kristu nia prezensa loloos iha Eukaristia nu'udar parte moris nian iha rain ka família. Ho dalan simples ida-ne'e, nia konsege hatudu katak fiar-nain nia moris lorloron nian mak fatin no razaun dí'ak liu atu adora mistériu Kristu nia futar Isin nian. Hodi selebra Eukaristia iha loron nia naroman, venera nia iha lurón sira ita-nia vila no sidade nian, comunidade sarani asegura Maromak nia prezensa iha ema nia leet. Ne'e la'ós buat kí'ik-oan ida, liuliu ba ohin-loron.

Ita fiar iha Kristu nia prezensa iha paun no tua Eukaristia nian. Ida-ne'e ita-nia fiar, maibé ida-ne'e ita-nia esperiéncia mós? Ita moris tuir loroloron buat ne'ebé ita fiar? Oinsá, maka, se ita fiar katak Jezús loos duni presente iha Eukaristia, maibé ita la hetan nia iha ita-nia moris loroloron? La'ós koinidência simples ida katak sira ne'ebé halerik kona-ba Maromak lakon iha sira nia moris maka sira ne'ebé falta ho modu frequente husi selebrasaun eukarística no resesaun pesoál komuñauñ nian. Iha sentidu duni atu sira ne'ebé para simu Eukaristia tenke halerik katak sira la sente ona Maromak besik ba sira, ka, piór liu, Maromak abandona sira. La to'o atu hatene katak Kristu hein ita iha Eukaristia se ita la foti oportunidade atu husik nia tama iha ita-nia moris no ita-nia difikuldade loroloron nian. La to'o atu fiar katak ita iha Kristu nia isin no raan ba ita-nia ai-han, se ita kontinua atu buka razaun atu tau Maromak dook ka lí'ur husi ita-nia moris no la husik nia tama iha ita-nia moris laran.

Ita selu presu ba ita-nia haluhan sira ka kuran apresiasaun ba Kristu nia futar Isin iha ita-nia mors lioroloron. Ema naran de'it ne'ebé la apresia presente nia simu, labele sente apresiasaun husi Doadór (ida-ne'ebé fó). Ho liafuan seluk, se ita lakon respeito no venerasaun ba Ss Sakramentu ita la merese respeito no atensaun husi Ita Nai Jezús Kristu. Se ita para atu pratika komuñauñ frequente, distáncia ida buras entre ita no Maromak. Ita labele se la'ós selu presu karu liu ba ita-nia kuran iha interese ba Kristu nia futar Isin. Iha kazu ida-ne'e, ita ne'ebé fiar iha Kristu nia prezensa loos iha mundu liu husi nia prezensa iha paun no tua, kontribui ba sentimentu auzénsia Maromak nian husi ita-nia mundu nia baburas. Ema hotu ne'ebé selebra Kristu nia prezensa iha ita leet iha forma paun no tua nian – ne'ebé ita Sarani sira selebra iha festa ida-ne'e – tenke sente nesiedade atu sai testemuñu kona-ba Maromak nia prezensa espesial ida-ne'e. Ema hotu ne'ebé hola parte ba Eukaristia hatene katak Maromak horik iha mundu nia fuan nu'udar ai-han no esperansa.

Nune'e, la to'o ba ita atu proklama paun no tua nia transubstansiasaun ba Kristu nia Isin no Raan, no atu selebra nia nu'udar mistériu agradesimentu nian ba Maromak. Ita mós tenke sai testemuñu prezensa ne'e nian, hodi ita-nia moris no ita-nia liafuan sira. Milagre ne'ebé ita profesa impoin ba ita obrigasaun atu haklaken. La iha ema ida iha direitu atu sente Maromak ida ne'ebé hili atu horik iha ita liu husi paun no tua, bosok nia; la iha ema ida iha direitu atu halerik kona-ba Maromak ne'ebé besik liu ba ita, no prontu hanesan paun no tua iha ita-nia meza.

Hatene tiha ida-ne'e, ita labele kontente katak ita hasoru nia pesoalmente, Ita-nia Eukaristia sei la sai auténtiku se iha ema ne'ebé hamlaha no hamrook ba Maromak seidak iha ksolok atu hasoru nia iha Eukaristia. Paun eukarístiku sei la sai Kristu nia Isin se membru balun Kristu nia la marka prezensa iha nia meza. Bainhira ita hakbesik Kristu iha Eukaristia ita tenke husu ita-nia an, la'ós de'it se ita preparadu

atu hasoru nia, maibé mós se ema sira nia hein mai hamutuk ho ita. Preparasaun dí'ak ba simu Jezús iha sakramentu la kompletu, tanba ita la iha sala boot. Ita presiza haluan hodi husu ita-nia an se ita preokupa ho sira ne'ebé fahe Kristu nia Isin ho ita nu'udar maun-alin.

Signifikativu tebes katak bainhira Jezús hakarak han-kalan ho nia eskolante sira, nia haruka sira rua atu buka fatin ida no família ida iha-ne'ebé nia bele selebra han Páskua nian. Kristu la hela iha Eukaristia ba ema uitoan de'it ninia benefísiu. Ema hotu ne'ebé hakarak selebra Kristu nia hakaran atu horik iha paun no tua tenke buka bainaka-meza seluk atu fahe paun ne'e. Fahe Eukaristia no tama iha komuñau ho Kristu tenke filafali ba ita-nia maun-alin sira no tulun sira atu deskobre katak Maromak de'it maka bele habosu sira-nia hamlaha no hamrook. Bainhira ema terus laran-taridu, kanek, moris-mesak/solidaun no mate, sira tenke hetan konvite atu simu Kristu iha Eukaristia. La iha ema ida ne'ebé simu ona Kristu ignora ninia maluk ne'ebé presiza. Ema hotu ne'ebé esperiénsia ona Maromak nia domin, domin ida ne'ebé sai paun husi trigu musan, labele hadook nia an hsui maluk ne'ebé presiza domin konkretu iha forma ai-han nian ba isin no klamar. Ita-nia sidade no ita-nia uma sira sai fatin enkontru nian ho Maromak, se ita lori iha ita-nia fuan maluk sira ne'ebé presiza ita. Maromak marka nia prezensa iha paun pedasuk ida, nia mós prezente iha ita-nia fuan sira, se ita iha nia laran ita sente ita –nia maun-alin sira nia nesesidade sira. Ne'e mak presu no kondisaun nia tau ba ninia main/vinda.

La to'o agradese Maromak ba prezente ne'ebé nia haraik mai ita iha Eukaristia. Ita presiza husu ita-nia an rasik dí'ak sá mak ita hetan se ita la tau ita-nia an atu serví ita-nia maluk sira ne'ebé presiza. La iha sentidu ba ema hanesan ita ne'ebé loke an beibeik ba Maromak, atu taka an ba ita-nia maluk sira. Hodi soi Kristu ita-nia moris tenke sai nakonu ho domin ba maun-alin sira. Ita labele habosu de'it ita-nia nesesidade kona-ba Maromak no husik ema seluk hamlaha iha sira-nia nesesidade materiál no espirituál, sira ne'ebé kuran liufali ita. Sira ne'ebé la fiar iha Kristu nia domin horik iha Eukaristia, sei fiar iha nia se karik sira haree ema sira ne'ebé tama iha komuñau ho Kristu tau matan ba sira ne'ebé presiza nia. Mundu nia fiar iha Kristu nia domin depende ba ita-nia devosaun no ita-nia moris loroloron atu pratika domin ba maun-alin sira.